

四庫全書

集部

欽定四庫全書

集部

華陽集卷

一至五

詳校官庶吉士臣瑚圖禮

主事臣呂雲棟覆勘

總校官編修臣王燕緒

校對官主事臣陳文樞

謄錄監生臣宋學廉

欽定四庫全書

集部四

華陽集

別集類三 宋

提要

臣等謹案華陽集四十卷宋張綱撰綱字彥  
正金壇人大觀政和間試舍法三中首選初  
與蔡京王黼不合二人每擠抑之及南渡後  
登瑣闥復與秦檜隙遂致仕檜歿乃召用終  
於叅知政事事迹具宋史本傳綱健於為文

每一落紙都人輒傳播遭建炎兵燬什不存  
一又以秦檜柄國懼為所忌絕意著述以故  
流傳不多嗣子堅搜輯得八百餘篇至孫奎  
始刊板寘郡學以其自號華陽老人即以名  
集洪邁為之序凡文三十三卷詩五卷詞一  
卷後附行狀一卷詩文典雅麗則講筵所進  
故事因事納忠亦皆剴切至南宋之初盡革  
紹述之弊凡元祐諸臣之後無不甄錄轉相

標榜頗滋偽冒網乃復有劄子論黨籍推恩  
太濫尤可謂卓然特立毫無門戶之見者矣  
乾隆四十六年九月恭校上

總纂官

臣紀昀

臣陸錫熊

臣孫士毅

臣毅

總校官

臣陸

費

擘

擘

--	--	--	--	--	--	--	--

華陽集原序

華陽集四十卷故參知政事資政殿學士章簡張公所著也始大觀政和間庠序宏盛彙四方傑造於京師公起朱方孤生持經術驥奮聲高一時儒先仄足歛衽比三冠倫遂策崇政名為第一天子當屣挹歎有旨墜用矣老蔡方顓國挽使聽已倡富貴有命之說連柱之且雅憎王黼為邪勿忍識其面擢纒學館郎官坎壈過十稔澹然無嗟悔意獨玩心於內不肯頃刻輟為文章每

一落紙都人即日傳播至汗漫棟宇建炎庚戌家鄉厄敵兵篋積貯藏六丁下取略盡煨燔所存僅逮百一既檜相得志齟齬知名士惡子組織人語言買進梯禍公在睥中又為之閣筆袖手秦亡公亦老故歷歲久著錄不能多薨之明年嗣子戶部郎中堅蒐拾論次合八百五十九篇將刊鏤垂世未克而沒後二十三年嗣孫池州使君奎乃出捐家貲板真郡學邁首得其書伏讀之大抵制詞嚴而緝表疏卷卷主敬雖莫齒退休未嘗以



一篇倩人代作而講筵故事十九章剴切明白如仁宗  
得君人之道舜不窮其民光武開心見誠唐太宗察上  
封者之姦憲宗御下有術文宗不能正陳夷行唯阿之  
罪皆反復致志因事納忠非若等輩區區備課程而已  
池州以書索序顧晚出遼絕欲謝不敢念昔者辱與戶  
部游而伯氏文惠公奉使淮東時築亭結樓於官舍公  
為賦兩詩酒殘搖江波吞翠壁之句至今諷咏在口輒  
藉以自恕然甚慚公自稱曰華陽老人集用是以名紹

熙二年三月十六日序煥章閣學士宣奉大夫提舉隆興府玉隆萬壽宮魏郡公洪邁撰

天地山川靈秀融結必生竒崛瑰瑋之士邁跡振古以開文獻於將來而文獻之傳亦必有尚論景行為之後進者以見聞而羽翼之斯二者恒相須也故杞宋無徵孔子傷之而聖賢經傳亦皆俟諸子以世其傳此不特皇王之謨烈廊廟之規章即德冠一鄉行徵一邑者嘉言懿行典刑攸繫百世不可磨也或曰人亡則如之何

揚子雲云在則人亡則書故頌詩讀書以論其人茲尚  
友之道也予自垂髫時習禮於鄉校見有宋先哲張章  
簡公者且而俎之於祠矣聞其人鄉邑之耆俊而國家  
之梁棟也心竊慕之及考之宋史參之邑志僅述其姓  
字與行跡之一二考其遺文洪業蔑如也則心甚惜之  
曰之人也之德也乃罔聞於後世乎及予致政而田適  
與其裔孫光裕者游偶出殘編斷簡於蠹餘以示余讀  
之嘆曰偉哉吾鄉之先哲有是哉孝義著於鄉邦勲烈

赫於廊廟代言西掖則典雅麗則允黼黻乎皇猷正色  
立朝則斥奸遠佞直爭先於日月雖佐業偏隅而身係  
社稷之安危關君德之休戚者數十餘年君臣協志壽  
祿永綏此其文章政事節概勲猷蓋庶幾韓范富歐之  
儔公嘗自書曰以直道行己以正色立朝以靜退高天  
下人皆以為不負所言是誠擁方茅之秀匯五湖之精  
挺身一時而殊絕百代者也不幸重罹兵燹著作之屬  
煨燼者已十之八而嗣是子孫衰謝賢哲無傳僅有諸

編之未斬者數百年來冥冥罔攸表章此豈一邑之漏  
典實國史之遺文哉夫賢人處鄉邑之中擅一言一行  
之長者人猶膾炙而模楷之而况公碩儒名相遭遇四  
朝言聽計從澤及天下可使其終泯然乎予生也晚遇  
之遲尤幸斯編未盡斬而後生者得與於斯也故緝而  
梓之以播之鄉邦傳之四海使百世而下知吾鄉有立  
德立功立言不朽之士而興起者無艾也且孟軻傳聖  
道喜居之相近而荀卿有言法後王欲知上世則知周

道謂其近已而易行也今豪傑產自鄉曲微言懿行炳然猶在耳濡目染依歸更切仰止高山又奚必遠有所慕哉故茲編之行也寔期前哲有光後生多賴非徒虛言是行而已是予竊有志也夫是予竊為望也夫公諱綱字正彥所著表奏詩文等略具文集中行迹具洪公箴狀中甚悉故不復著享年八十四居邑西之希墟有宅號稱西府見方輿勝覽明萬歷丁酉同邑後學于文

熙撰

欽定四庫全書

華陽集卷一

宋 張綱 撰

外制

胡世將知鎮江府

四郊多壘每深當宁之憂十國為連尤重殿邦之寄將  
使閭閻之安堵其惟師帥之得人爰擇時髦肆頒明命  
具官某論篤古今而富淵源之學智周事物而高練達  
之材嘗進列于從班尉有聲于詞掖方時多故庸許即

安載稽望寔之乎宜委蕃宣之重眷朱方之會府當行  
闕之上游田桑或廢于兵屯獄訟靡闕於吏課興言積  
弊深軫至懷昔宣帝閔斯民愁恨之聲爰重守相之任  
而文皇錄刺史才否之狀用昭廢置之公朕師其言今  
以命爾往究厥職別俟寵褒

邵溥復徵猷閣待制

責人臣以見危致命之義蓋萬世之常規眎天下以救  
過宥罪之仁茲一時之盛典乃眷甘泉之舊嘗于丹筆



之書屬有龐洪稍還光寵具官某奮以時望儀于本朝  
早承三接之榮亟貳六卿之職一從吏議久去周行亦  
既省循宜見濶略霈雷雨而作解已疏南洽之恩近日  
月而依光用復西清之列爾其益圖遠業務蓋前愆庶  
晚節之可觀佇中興而來助

檀倬復徽猷閣待制

朕即位以來與民更始閔一夫之不獲每推肆眚之仁  
顧三尺之靡容亦與自新之路矧在謫籍嘗為從臣宜

均寵光以復玷闕具官某頃緣拔擢寔歷高華坐懼朋  
附之言辱在譴呵之域孽由自作念久去于周行恩不  
汝遺既數霑于允澤其即殊庭之邃聿升次對之班包  
荒不以遐遺朕欲盡捐于宿負無咎在乎補過汝宜益  
勉于新圖及此艱難尚期報稱

牛臯轉兩官

殺敵為果莫先制勝之謀戰功日多宜懋疇庸之典具  
官某忠於為國奮不顧身親更百戰之餘獨冠三軍之

勇志平外侮期復中原大挫敵鋒有嘉戎捷比既付以  
翰藩之任寵之庶察之權吉語嗣聞計功特異更增顯  
秩併示褒恩其益勉于壯猷庶克終于偉績

李道遷榮州團練使

朕念艱難以來干戈未息圖維疆場之事寤寐將帥之  
臣苟功善之有聞顧褒崇之可後惟爾協謀王事戮力  
戎行材蕪將畧之優功有戰多之積比欲遣臨于外鎮  
蓋將就付于中權成命既頒辭寵以避有嘉謙德宜錫

懋恩益務遠圖欽予特命

李回落職宮觀

十國為連是為朝廷之重寄萬夫觀政豈容師帥之不  
賢物論既喧邦刑敢緩具官某起從謫籍擢貳政機頃  
臨大江之南旋分方伯之任庶回晚節共濟中興報政  
之期指日以俟及是再期之久且深恤于民勞乃惟衆  
惡勿勝忽駭聞于朕聽設施無狀悖謬其謀承詔旨則  
匿不布宣上封章則肆為欺罔後棄公議橫市私恩義

方不肅于過庭姦賊至于狼籍冗食猥多于入幕聚斂  
因以煩苛黠胥挾寵而威權暗移名賊顯行而方畧倒  
置曾是股肱之舊迄無尺寸之功民生不聊誰任其責  
覽十條之來上按三尺而靡容其鑄秘殿之華往食真  
祠之祿尚從寬典益懋省愆

陳宥昭宣使上復一官

法行必自近雖左右前後之人苟有罪者法所不赦恩  
施欲及遠雖竄逐退閒之久能自新者恩所不遺具官

某出入宮庭典司禁衛獲譴以免閱時滋多蒙霈澤之  
屢更諒洗心而知過稍還秩序用示寵光益勵操修以  
圖報效

李橫轉行翊衛大夫

漢武帝寵力戰之士而置賞功之官魏文侯有勝齊之  
功而受上聞之爵矧予藩翰積有勞能可無寵光以示  
褒勸具官某忠勤體國志畧絕倫殿天子之邦威名獨  
著下將軍之令殺敵無前顧瞻河洛之區行入版圖之

舊提書屢至嘉歎不忘宜益峻于崇階庶以昭于茂烈  
爾其乘建瓴之勢鼓行而西收破竹之功凱旋以報期  
在朝夕別對休榮

彭玘轉一官遙郡刺史

朕勵志中原靡忘旰食惟時恢復之計悉委將帥之臣  
功狀上聞褒崇可後爾早懷忠義獨奮機權斬將搴旗  
屢奏邊廷之捷第功行賞宜登勇爵之優其就進於崇  
階俾遙分于刺部服茲休命益茂戎昭成一爾遠圖副予

延望

凌唐佐贈徽猷閣待制

臨難不求苟免是為守節之臣殺身足以成仁宜舉飾  
終之典具官某奮自儒學寔階顯途宣力方勤遭時多  
故身雖受辱豈忘報于公家義不愛生卒見殞于賊手  
深愴無辜之戮有嘉將死之言陟華貫于西清慰營魂  
於下地歌予茂渥昭爾遺忠

錢忱父景臻追封衛國公



朕祇率訓典大饗合宮熙事備成鮮澤旁暢眷茲在列  
咸與寵榮施及其親豈間存沒具官某胄出王門之貴  
姻聯帝室之華被遇累朝躬秉一節夙著老成之望更  
高身後之名偉忠懿之遺勲既克成於祖德問漢陽之  
所服尤想見其家風有子象賢任吾環衛爰念教忠之  
素宜推廣孝之恩追錫徽章益開茅土信都舊鎮雖無  
改於旌門淇澳新封庶以昭於幽壤精爽不寐尚其享  
之

錢忱妻康氏封安定郡夫人

朕以季秋大饗均福天下羣臣在列咸被光寵湯沐之  
賜迨其室家國有舊章予不敢廢具封某氏早以懿行  
嬪於甲族奉我秦魯大姬夙夜不怠見謂閨房之秀寔  
增戚畹之華序爵從夫疏恩異等其以小君之號就更  
大郡之封服此綸言益勤婦事

許中降直秘閣

朕以北敵告警士大夫流寓東南數詔郡國謹遇以禮

爾幸蒙推擇為一路帥守職在奉行詔書所宜體朕德  
意務安存之而廼坐視淪落忽焉不加戚于其心唯恐  
他族實福以奪已便既欲絕其廩稍則又請以興徙信  
如爾言凡失職之士將安所託處乎朕方布大信于人  
命以優卹而反危動之何以示信靜言乖謬罰其可逃  
延閣華資稍從降黜服我寬典毋怠省躬

董震轉武節大夫遥郡刺史

朕惟康濟艱難勤勞夙夜思得竭忠奮義之士付以折

衝禦侮之權因示褒優庶圖恢復爾威名夙著智畧有  
餘廼心不負于朝廷自率來歸之路抗志欲平於外患  
更多斬獲之功眷予方念于中原倚重孰先於西土方  
擇維藩之寄宜推敵愾之臣地合三州勢當一面用啟  
爾宇爰俾鎮臨克壯軍容坐期綏靖名郡遙分於刺舉  
武階兼進于崇資爾其祗服恩榮益思報稱佇俟凱歌  
之奏尚增加地之封

杜林魚澤劉寶王升各轉遙防遙團

朕于艱難之際惜名器不輕予人至于執干戈親行陣能為朝廷立功以寬朕北顧憂則大官高爵亦所不吝具官某忠勤自奮沈勇有謀從大將以徂征摧敵師而屢捷第功來上嘉歎不忘服茲褒勸之榮益懋邊陲之績

闕

岳超轉防禦使朱公旦高政許大同轉團練使國家方事干戈蕩平敵境故於戰勝克敵之功自大將軍而下第其優劣悉加褒賞蓋所以勸也具官某深于勇略久在戎行出討不庭所至輒克是謂一時梟俊之

士庸公來上朕甚嘉之遷官一等以答忠勤益勵壯猷  
用期報效

謝克家知平江府

朕時巡方岳倚重吳門城邑相望是謂股肱之郡藩宣  
所寄必求師帥之賢眷我洪儒久勞遠服載新符竹宜  
錫贊書具官某智窮萬物之微學總百家之要孤忠自  
奮見義必為直道正言進彌縫于主闕高文大冊久潤  
色於皇猷俾參機務之煩尤賴弼諧之助暫去廊廟數

更翰垣治有能名達于朕聽茲用嘉其丕績畀此大邦  
所期名德之崇益重鎮臨之望念斯民歌于來暮其無  
憚于暑行惟郡守職在承流將亟觀于河潤

歐陽懋除徽猷閣待制知建康府

朕惟江左名都朝廷重寄承流宣化宜求師帥之賢禦  
侮折衝兼倚藩維之固爰舉于衆茲得其人具官某性  
資高明才術敏達屢更器使久著忠勤擾吏最於侯邦  
贊軍謀于督府嘉爾名臣之後用昭遺德之傳升次對

之清班俾分憂于方面民勞未息其師蓋公清靜之言  
成役方更盍講充國留屯之策佇觀丕績嗣有寵光

連南夫知泉州

往者閩寇弄兵諸郡相蹈藉而泉南阻險以免泉之地  
並海蠻胡賈人舶交其中故貨通而民富夫富則易驕  
寇不至則怠而莫之備朕思得仁明練達之士以守茲  
土求於已試莫如汝宜具官某文學政事高于一時為  
吾從臣公論翕然歸重朕嘗考汝江左三州之政其施



設不同而民皆有愜志茲用命汝往臨于泉者汲黯為東海太守以大治聞後遷淮陽居郡如其故治汝尚勉之其為朕移所以守三州者施于泉人勿使驕惰則予一人汝嘉

馮軫降一官

國家度緇黃以牒掌于祠部而下之四方爾居是官迺不謹察合符繆互部使者疑之昔馬援以印文不同即聞于上而石建書馬闕一退輒恐懼爾當知矣黜官一

等姑示薄懲尚省前非以脩厥職

祁立轉團練使

朕于人之勞雖微必錄矧茲蕩平劇賊底定一方第功  
有差可無褒勸具官某久在戎行深于將畧荆湘之役  
陷陣先登爰推賞典之公以示眷知之意益思策勵毋  
負恩華

慕氏魏氏轉媿好

朕念昭慈保茲皇祚已畢三年之服敢忘萬世之功爰

詔有司載疇舊典既推茂渥下迨宗親宜有異恩以及

嬙御具封某稟徽柔之德躬淑慎之儀叙于王宮修厥

婦事

魏氏具封某蚤備德容之懿雅勤  
圖史之規進服宮闈率遵婦事

方哲宗當宁既

殫夙夜之勞逮太母垂簾更資左右之助感今懷昔撫  
事愴情爰申品秩之榮式示褒嘉之意服我休命往其  
欽哉

郭安奴轉尚儀蘇迎喜轉司寶宋七娘轉司衣

朕念昭慈保佑之功痛深追慕几筵初徹爰舉彝章以

爾祇奉壺闈夙夜不怠進升內職用示寵光服我訓詞  
毋忘祇戒

朱倩奴轉掌綵

爾事我昭慈謹于內職愴念几筵之徹爰推綸綍之恩  
進陟婦官式彰寵渥

士晤轉防禦使

朕惟皇族近親不責以吏事須歲月之及序則遷厥官  
茲實祖宗舊法務隆恩寵予其敢廢具官某神明之胄

禮法是遵居無席寵之驕克有維城之譽蚤奉朝請進  
列衛官歲既十周會課求上其正扞防之秩用昭眷遇  
之私服我訓詞毋忘飭勵

陳永錫遷職

宮庭之制典司有官以率前後左右之人以申戒令糾  
禁之事其職顧不重哉以爾早奮材能數更事任歷險  
阻艱難之久靡憚勤勞于出入起居之間備見忠謹積  
功既著實簡予懷其進陟于內司俾益圖於報効服此

休命用副眷知

華陽集卷一

欽定四庫全書

華陽集卷二

宋 張綱 撰

外制

王瓊除天武捧日四廂都指揮使充淮南東西  
路安撫使司都統制

朕思恢復中原經理淮甸比謀元帥既付虎臣必資統  
制之權爰整師徒之衆維時宿將宜錫贊書具官甘肅  
髮從軍奮身許國懷禦侮折衝之略有牧人御衆之材

奇謀暗合於孫吳偉績遠希於衛霍被堅執銳賈義勇  
以無前逐北追奔積戰多而居最久留行闕董我親軍  
益見忠勤宜分憂寄用升華於部督俾總率以戎昭朕  
命甚優爾行惟寵深溝高壘豈徒為固圉之謀訓卒厲  
兵於以俟侵疆之復

孟忠厚妻王氏封秦國夫人

朕追念昭慈德音如在奄經祥祭孝思敢忘宜頒封爵  
之榮下及宗親之懿具封某氏蚤嬪甲族獨著令儀禮



先蘋滌之勤譽藹閨房之秀襲后家之餘慶既克有聞  
配君子以疏榮豈云虛授用易三秦之壤俾新大國之  
名是為寵光往其祗服

高士曠轉遙郡承宣使差權官客省四方館閣

門公事

唐竇氏雖緣外戚姻家然皆自以才猷結知天子厠迹  
名臣朕嘗以是求之今日苟有出於懿親而能以器業  
自奮則亦加以寵榮而策勵之庶無愧於前代具官某

胄出高門是為宣仁近屬早由忠謹數更事任閱雖  
遠風流具存粵自初載嘗執羈縶從朕於艱危勤勞百  
為夙夜匪懈以扞牧圉積功居多傳曰祿勲合親朕豈  
忘之哉爰畀郡符往司庶務其將進爾諸寶之列爾尚  
勉之母忘大訓

董貴轉官遷團練使

朕方疇咨將臣疆理天下惟恐一士之或失也倘有被  
堅執銳忠憤不忘於朝廷顧於高爵厚祿豈所惜哉惟

爾武勇自奮智能有餘粵自艱難即親行陣摧堅却敵  
屢奏膚公茲用正爾武階而畀以戎團之重爾其祇服  
寵渥思朕所以待汝之意益加懋勉以報所蒙

張玘轉官

朕惟郡太守繫千里休戚未嘗不重其選而况陝服會  
府當兵火瘡殘之後外侮可虞民不安業則使之共理  
非其人可乎以爾懷許國之忠奮兼人之勇早親行陣  
屢挫敵鋒威名所加遠近信服茲用進爾武階并茲西

土爾其為朕安集黎元綏靖疆場使夫妖氛不作而境  
內廓清無事則予汝嘉嗣有褒寵

曹成轉右武大夫

朕設勇爵以叙進天下有功之士至於右列其秩尤高  
方時艱難惜此名器非用褒勸不輕假人具官某沈勇  
有謀奮於行陣率衆數萬聽命朝廷蓋知夫轉禍為福  
之機而有尊君親上之義朕甚嘉之上閣華資肆以命  
汝其思吾所以寵綏之意益圖忠蓋無忘報國

翟興贈節度使

固藩維而外拒權莫重於敵愾之臣探甲冑以先登義  
孰踰於死難之士有能兼是二者獨取名於一時宜舉  
卹章以昭大節具官某雅好將帥之略亟勵忠勤之規  
糾合師徒鎮臨方面肅中權之威令禦外侮於封圻駭  
茲勁敵之憑陵誓與孤軍而鏖擊奇禍既作奮勢莫回  
狼暉馳師身獲死而無恨張巡遇害氣吞賊而有餘念  
爾仗節之忠興予當守之歎用頒齊鉞嘉賁泉扃庶幾

精爽之存不昧寵靈之錫

董先除觀察使陝西安撫

朕惟陝右之地風俗勁勇名都大邑雄於天下爰擇主帥寔難其人以爾奮不顧身忠於衛上粵自艱難之際即親行陣之榮休績著聞民用信服宜升勇爵仍畀廉車其往為朕撫茲三州兼治號略之政使夫姦宄消伏漸寬疆場之虞閭閻乂安復務農桑之業在爾懋勉毋

忘訓詞

韓肖胄除簽書樞密院事

贊襄帷幄允資同德之良綏靖邊隅尤重本兵之寄矧  
風塵之未息方社稷之是憂歷選廷臣參決廟勝必兼  
隆於才望迺克副於倚毗具官某志大而高明謀深而  
博敏輔中興於初載勤勞惟國事之圖聯法從之清班  
議論得大臣之體眷維韓氏之顯蓋自慶厯以來父子  
繼為宗臣勲烈蔽在盟府宜有聞孫之秀蔚為當世之  
英務儒學以自將振流風而不墜朕慨念祖宗之緒恢

復古之宏規每惟勲闕之家嘉象賢之有後是用考觀  
素履昭示眷懷加秘殿之隆名付樞庭之重柄昔宣王  
有常德以立武豈徒震驚於徐方而管仲作內政以寓  
軍殆將方行於天下尚圖遠業以嗣先猷

胡松年除工部尚書

六卿分職政事悉摠於中臺百工惟時制作獨專於起  
部任責既重選能為難得於邇聯舉以率屬具官某異  
材間出時論同歸堂堂冠人物之英蹇蹇勵王臣之節



智識能窮於物表尊其所聞而高明利害不怵於胷中  
養之以氣而剛大早由詞掖出領侯藩兼文學政事之  
長得朝野縉紳之譽迨登瑣闥有古批勅之風繼侍經  
筵起予正坐之講簡自朕志其若予工念無臺池苑囿  
之觀固靡勞於增飾惟是甲冑戈兵之器正有賴於咸  
精服我訓言佇觀丕績

黃龜年除中書舍人

持橐簪筆均為從臣視草代言獨高詞禁當朝廷之多

故出告令於四方欲昭德意志慮之乎正賴討論潤色之美求稱厥職可無其人具官某問學淹該才猷敏博務明國家之體深達事物之情往在艱難得於扈從寢膺顯仕尉有休稱正奉常禮樂之司肅御史風憲之地彌綸宰屬踐更史官嘉其發於辭章雅有合乎法度宜登鳳閣分掌綸言夫惟操筆成文自得中和之氣庶幾扶杖往聽思見德化之成尚其勉旃以副予望

孚濟侯加封嘉顯孚濟侯

爾惟明神受職下土克有常享大庇吾民愆陽為災祈  
禱屢應有司以實來上朕用歎嘉增錫徽章式昭寵渥  
尚期靈爽無替格思

顏孝恭轉遙郡團練使

往者南城盜起害吾良民偏師討之既克底定有司言  
狀可無寵褒具官某智謀有餘忠勇自奮能率衆士深  
入賊巢一舉成擒績效居最茲用進秩以昭爾能毋替  
厥勤尚圖報稱

呂祉轉一官

間者盜起湖湘民用震擾惟爾按臨一路能知尺籍伍符部發將士授之方略迄以蕩平肆疇厥功進官一等往服朕命益懋所職

董旼轉兩官

賞國之典也所以待天下有功之士方時多故苟能為朕輸忠效智以遏亂略則應於功令賞可後哉具官某奮不顧身久親行陣從吾大將屢收戎捷盜起湖湘復

能說以禍福卒使數萬之衆投戈以歸有司上其勞績  
良用嘉歎進官二等爰示褒優無替厥勤尚圖所報

曹成轉左武大夫遙郡防禦使

國家用武武過寇攘有能為朕摧堅却敵顧於爵賞豈  
所愛哉具官某久在戎行深於將略嘗率衆士大破賊  
羣有司上聞績效顯著其升上閤仍畀使名益務忠勤  
用圖報稱

潘致堯轉五官

朕頃以邊陲未靜，求可使隣封者。惟爾有材優於專對，遂授以指遣之出疆。果能為朕伏節馳驅，通二國之好，以歸夫奉命不辱。既無愧於光華，則有功見知其可。後於褒寵，峻升秩序。用答勤勞，毋怠遠圖，以修厥職。

裴行轉遙郡刺史

爾久以勇聞，從吾大將掃平狂寇。見謂勤勞，應進一官。制不可越，升刺名郡。宜知茂恩，益勉戎行。毋忘報稱。

辛彥宗叙左武大夫康州刺史

赦過宥罪帝王盛德既渙大號咸與維新具官某生於  
將家久更器使坐累貶削克自省循被此龐鴻宜見式  
序往其茂勉尚蓋前愆

安時轉官

量材授官計功賦祿此國家馭羣臣之法也至於皇族  
近親則不然吏事勞能一切略之而特以歲月之積進  
其秩序蓋敦睦之道如是而後可具官某生長富貴無  
膏粱之習講聞詩禮有忠信之行久列衛官士論甚美

有司會課以為當選夫兵防之職視武階亦峻矣今以授汝往其欽承益務謹良以光屬藉

仇愈降兩官

朕以爾節制舟師控於海道迺者徐文率衆背義驚吾良民實爾所臨曾無忌憚統馭之術益亦踈矣豈朕所望哉褫官二等姑示薄懲尚省厥躬益警爾衆

馮正已落職衝替

爾以近臣之子列於縉紳不務謹良淫醜自露有非士



之所當為者延閣之班尚安得處其加鶴奪姑示薄懲  
葉渙落職宮觀

池陽邊臨大江以兵為重爾任帥事宜知尺籍伍符謹  
修補卒之法而迺妄行募召倚為扞防凡所竄名皆羣  
不逞坐致兇謀潛會肘腋變生逸其渠魁務茲姑息郡  
寄若此朕何賴焉其鶴論諛之華往食祠宮之祿猶為  
寬典毋廢省循

韓肖胄母文氏特封國號

朕惟天步方艱戎衣未定爰擇近輔往使鄰邦受命而行既盡大臣之節勸子以義又聞賢母之言蓋其志有私親之所難則以知夫國事之為重肆加褒寵靡限彝章具封某氏太師之孫魏公之婦積勲勞於異世萃忠孝於一門允蹈令儀豈獨專女子之職習聞先德固知徇家國之勤眷予樞臣夙遵母訓比通兩國之好迺有萬里之行果能教以義方謂勿憂於家事慈闈定省雖暫遠於晨昏使節光華庶克昭於忠信有嘉爾志良副

朕懷爰䟽大國之封用侈雕軒之飾綸言錫寵宜益保  
於耆年綵戲輝庭將共觀於復命

李膺落職降一官

天下之賦鹽利居半方時艱難仰此以佐邦用則商賈  
懋遷宜有以優假之爾為郡守不知體國迺託贍軍之  
名違法率斂其人上訴輒更文書變詐自解詔案有實  
罪不可追黜官一等罷直延閣尚為寬典勉務自新

陳永錫特轉行遙郡一官

賞以序官國之令典藏  
在盟府示不敢私惟爾  
知事上之忠得謹身之  
道服勤殿幄積歲居多  
迎護宮闈任職無闕  
宜升武秩舉刺大州用  
荅勞能尚圖報稱

華陽集卷二

欽定四庫全書

華陽集卷三

宋 張綱 撰

外制

解潛再任荆南鎮撫使

昔韋皋治蜀張建封治徐嚴震治鳳率以久任而成功  
名未聞數變易也載在舊史朕甚慕之具官某有牧人  
御衆之材有折衝禦侮之略作鎮荆峽兼總兵民恩威  
並施遠近信服朕方以為西南藩翰之固而飛章遽至

乃以滿歲自言夫申畫封圻撫綏方面蓋將久其所職責以成效雖終更有制豈應亟還宜申錫於贊書俾重臨於郡政毋使有唐數子獨擅其美則予汝嘉汝亦永有終譽

樊彥端轉行遙郡刺史

朕惟王者用人有勞必錄一藝而上咸被褒寵以爾究習方技出入禁嚴祇奉有年率職彌謹用茲疇其功緒錫以殊恩往慎厥官益圖稱塞

士博轉一官

朕念國家多故皇族中微每推骨肉之恩欲厚根本之  
比矧茲會課敢廢舊章以爾胄出神明蚤聞詩禮恥貴  
驕之習敦信厚之風入奉內朝久居環衛用載頌於命  
綽俾升進於武階夫閱歲十周遷官一等得之匪易尚  
克欽承

士樽轉正任防禦使

考績之法治道所先雖予屬籍之懿親猶以積年而叙

進是曰舊典豈朕敢私具官某胄出神明閑於教訓雅知為善之樂居無席寵之驕列位內朝久著嘉譽有司上課法應第遷夫惟扞禦侮者既用名爾之官則以親屏周者其亦惟官之稱往服明命無愧古人

士賜轉遠郡刺史

刺史漢官也國家因其名以為武階所以待天下勞能之士而有司謂爾宗族之英久居環衛法當得之朕惟親親尚恩肆加寵命爾其益思祖宗流慶之及勉盡忠



孝求稱厥官勿期世祿之驕庶有維城之託

楊沂中轉官

司馬法曰軍賞不踰月欲其速得為善之利矧吾豪俊  
討定一方疇厥勞能可無褒勸具官某忠於衛上奮不  
顧身有古將帥之風能勵士卒之氣比緣妖寇竊發嚴  
衢命以徂往至則殄滅雖殺敵致果衆一迺心而發縱  
指示實由主將進司留務用為爾寵往其祇服益思遠

圖

沈昭遠改官

昔鄭當時推轂士及官屬丞史有味其言見稱後世矧予樞輔慎簡迺僚謂爾有材形於論薦召見便殿言合朕心宜進厥官俾仍舊服往承休命益勉所聞

舒清國除起居郎

昔孔子作春秋先正王而繫萬事大法昭然垂訓後世朕方日是御朝思濟洪業若時言動慎於幾微遴簡時髦昇職記注庶乎紀事得實如古作者惟爾操行純潔

秀于士林問學淵深蔚有文藻雙書中秘議禮南宮閱  
時滋多發聞彌著茲用命爾進直螭坳凡舉必書是為  
善志官守勿失嗣有寵褒

洪炎轉一官致仕

朕遭時多艱績業中興顧焦勞方急於求賢義豈容於  
謝事惟筋力或憊於盡瘁勢難彊以居官矧予邇臣服  
勞滋久宜頌命渥以休餘年具官某舊學淵源老猶篤  
志後生領袖論必據經名從江海退閒之餘擢真言語

侍從之列方資獻納俄爽節宣陟次對之清班就燕閒於真館露章有請遽欲辭榮當饋興嗟重違雅志俾遂山林之適仍嘉爵秩之榮祇服寵光用介眉壽

王岡王廷秀除直秘閣宮觀

朕惟在服在位之士宣勞國家或以疲老退於其去也宜有以寵綏之爾等踐更任使恪守靖共擢自郎曹真之宰屬閱時未久遽欲求閒其升延閣之華往食真祠之祿少休勞動尚勉壯猷

杜湛轉武翼大夫遷郡刺史

朕欲綏靖方隅而盜賊羣輩為害民久失業爾以忠勇自奮殺敵無前用能乘利席勝破蛇豕之毒有司言狀惟予汝嘉進陟武階升刺名郡恩寵厚矣往其勉之

劉大中除監察御史

迺者分遣使輶假御史持節導德意於四方而察郡國之政爾以端方亮直之資奉指銜命風望隱然奏牘屢聞刺舉無所迴避朕甚嘉之茲用擢居憲府遂正其名

夫耳目之官職在振肅紀綱督吏治以糾不法惟爾之能見於已試往其勉之勿苟勿隨勿使聲稱減於前日則為舉職克副朕意

梁彥贈官

惟爾奮自行陣蚤以勇聞盜起搶攘率先犯敵隕於非命良用盡傷贈官一等式昭異數營魂未泯尚其享之

李擢除徽猷閣直學士與郡

中臺政事之原尚書均為八座內閣圖書之府學士尤

高近班入則分六職以赴功出則畀隆名而示寵具官  
某蚤以儒術簡於公朝徧儀法從之華借罄辰猷之告  
頃從外服載陟周行亟進貳於冬官遂躋榮於宗伯朕  
方慎擇師帥撫臨翰藩用擢邇聯復分憂寄念宣勞於  
南省俾列職於西清寵遇則均往服恩榮之意論思惟  
舊敢忘忠蓋之規

曾楙除禮部尚書

周監二代備庶事于彌文漢鄙兩生起朝儀于綿絕朕

承祖宗積累之德悼禮樂散亡之餘名物雖具于有司  
制作靡遵于故典欲振迺職必惟其人具官某有厚重  
長者之風能通達當世之務蚤由時望亟被明揚寔更  
二省之嚴旋寘六卿之列詞章雅健極代言視草之工  
議論宏深見憂國愛民之志自違朝著久逸真祠益聞  
譽處之休深渴老成之助屬春官之虛位惟舊人之是  
圖已試曰能肆今命汝夫邁且玉帛宜兼節于情文若  
朝覲會同必因時而隆殺庶使威儀復正姦宄自消靡



聞擊柱之爭是謂播刑之迪往服朕訓無愧古人

宋伯友除刑部侍郎

堯帝清問下民時莫先于降典文王罔兼庶獄亦惟付  
之有司眷予邦憲之嚴實重秋官之職欲使無訟何擇  
非人具官某識量宏達而濟之彊敏之材性資粹溫而  
輔以疏通之智當官有守見義敢為頃由識拔之公亟  
躋侍從之列式我司寇能自得于刑書殿彼雄藩至不  
擾于獄市大亨衆論有嘉爾能其遂解于一麾以復掌

予八辟爾宜察吏刀筆重人死生豈獨以明允自將邁  
種阜陶之德亦庶幾剛正不撓無替廣平之風祇服新  
恩往思舊服

楊從儀轉親衛大夫

川陝用師久矣凡出入行伍有尺寸微勞者未嘗不錄  
而况被堅執銳勒部曲以立功名顧所以寵褒之其可  
後乎具官某沉勇多謀戮力自奮方敵師大入勤吾西  
顧迺能先登却敵屢紀殊效幕府上功進秩一等庸示

眷獎以勵其餘往服厥官毋忘報稱

陳楠升郎中

文昌六官之屬有郎中有外郎各從其資以序厥位爾以文行兼著再擢省闈有司上其閱閱即爾舊服用升正員夫以二十石之秩入贊地官之政望亦高矣往既乃心以充其實

李擢知婺州

昔汲黯由九卿出補淮揚薛宣以御史中丞為臨淮守

侍從之臣宜在左右然郡國得人不以去朝廷為惜也  
具官某文學奮勵有稱于時更踐禁途宣勞滋久惟東  
陽古郡扞戎南服若時師帥非賢不居是用擢爾於六  
官之列畀之西清延閣之華以撫臨其民朕之用人視  
漢無愧往服休命勿怠厥修

錢圻改官

銓部改官之法必稽歲月審功過察保任應格然後以  
聞于上惟時異恩則略之爾以儒學之秀克自奮勵為

屬樞府譽言達于朕聽召見便殿占對可嘉是用進爾  
京秩示吾所以推獎之意往服休命益勉厥勤

虞溥陸長民除吏部郎官

天官銓序人物其任重矣省方以來案牘散落巧吏猾  
徒詐欺百出寒士有不能堪者比詔有司除其弊源選  
吏以主之汝溥材識詳練有聞于時汝長民風力敏彊  
見于已試茲用簡拔為屬其往為朕摘辨條章檢捉姦  
偽要使官曹一清而賄謝之私自汝屏迹汝尚勉之無

負予詔

洪炎轉四官

遇臣下之禮宜務全其始終念死喪之威顧可忘於褒  
卹具官某言有壇宇學造淵源典刑獨紹于前人氣節  
雅高于流俗名自遠俗寘之邇聯期造膝以輸忠會積  
疴而去位義難奪志甫遂掛冠天不假年遽聞易箒命  
也不淑愴然興懷其峻陟于文階庶流光于泉壤尚惟  
精爽歆此恩榮

邢煥特贈少師追封國公

正位齊家允賴坤闈之助獲賢錄善宜先戚畹之英追  
賁寵章式昭異數具官某忠信而好禮靜專而寡求早  
奮志于周行亟躋榮于清貫踐揚滋久譽處彌休惟積  
慶之有初致流芳之未艾是生淑媛作配朕躬位正椒  
塗親隆肺腑齋壇授鉞專節制于中權華袞升班等  
威儀于上宰念淪忘之未遠愴閱閱以興懷再疏大國  
之封仍冠三孤之秩夫雲臺畫像伏波豈乏于勲名而

石曰陰功平壽宜膺于命冊尚期精爽服此恩榮

邢孝揚除直秘閣

朕讀周詩而美葛覃之化稽漢制而隆肺腑之親匪為私恩厥由舊典爾恭慎自守志節可嘉顧于中宮寔謂同氣俾升華于延閣庶增寵于私庭往服官榮式彰眷遇

后姊邢氏加封郡夫人

朕于戚里之家不欲以私恩掩公義然義有不可廢者



恩得以行焉惟爾克懋女德實為后兄習聞環珮之聲  
秀發閨房之譽疏封大郡進號小君服此茂恩益修淑  
慎

郭孝友禮部郎官

文昌設屬唯儀曹舊號南宮舍人稽古禮文之事與夫  
尚書牋奏皆在所掌其選甚艱爾以儒學有聲踐歷滋  
久擢居省戶孰曰不宜惟制作必遵于典常而撰著務  
明于體要是為稱職嗣有寵褒

趙濡禮部郎官

祠者國之大典職在春官而祠曹主之爾以儒術自奮克世其家官于奉常見謂通敏省戶之選僉曰汝諧往既厥心毋忽朕命

吳革除直秘閣

中秘圖書之府以儲天下英俊之士惟爾奮由材智久贊軍謀奏事便殿議論通敏其往寓直延閣以昭示寵獎之意欽予時命益勉厥修

栗順等遷長史并司馬

惟爾世懷忠順克守教條有司以言進爾上佐往服恩寵思報所蒙

后妹邢氏并弟婦高氏並封安人

命婦八等之制惟夫若子通籍于朝始得以序進焉至于一時異恩豈限彛典爾以中宮女弟

高氏云后親之懿

淑慎

有聞念方加惠戚藩宜見優寵是用躡進封號以昭朕意往服休命益茂爾德

華陽集卷三

欽定四庫全書

華陽集卷四

宋 張綱 撰

外制

王序封贈二代

故祖伯琪故父夢陽故祖母張氏前母陳氏故母向氏

朕頃者合宮享帝慶賜遂行縉紳大夫恩及父祖

陳氏向氏

云父母

存亡靡間厥惟舊章

具官故祖故父或以爾

抱才不施

張氏陳氏

向氏云闈訓具宜

積德甚厚有孫能仕

父母云有子

遂至大官推其

本源

父曰推其忠教母曰推其母慈

用贈封秩服此休命以光重泉

王序故妻金氏

命婦爵秩各從其夫茲予慶賜之行燕及臣工之列既  
疏榮於祖禰仍追賚其室家具官某妻某氏相其良人  
登於顯仕生具淑德沒有令名宜更大郡之封以慰重  
泉之望營魂未泯服命惟新

向子廉復官

朕惟欽聖功在社稷萬世永賴遭時多故而向氏子孫  
流落殆盡惟爾幸占仕籍乃復坐累削官念之慨然宜

見褒序既復文階之峻更升延閣之華以寵戚藩斷自朕意往服休命尚益前愆

王草追授中大夫仍落職

朕觀前世酷吏慘刻少恩未嘗不惻然動心而况出于近時殘鷲殆有甚者按其見惡雖死不赦具官某素行陰賊盜竊寵榮當政和宣和之間聲焰熏灼專以刑戮為暴觀望相指陷人於罔寬痛之聲達於上下累仁聖好生之德傷天地至和之氣厥罪既著身不即誅顯秩崇

名沒猶冒處益於爾失刑甚矣宜從追削少謝無辜爾則何知要為後來之戒

張叔獻除直閣提刑

朕惟爾父當靖康艱難之際竭節自奮犯彼兇威身陷北庭忠在王室肆求厥後大臣以爾名聞引對便朝有嘉占奏進直延閣往按祥刑豈獨示朕一時異恩亦以為後世臣子之勸

楊選馬千轉行右武大夫



師出以律故能有功賞不踰時所以示勸具官某智窮  
武畧勇冠戎行往敵犯邊奮身衛國數其軍實積有戰  
功宜升上閣之華以聯橫列之峻往服休命益勉壯猷

田開除刺史

往者北師大入西土人以不靜賴我將士雲集霆擊以  
克有功幕府具聞爾實居最錫以褒命用昭寵渥尚思  
懋勉無負厥官

許份轉一官致仕

事君而能致其身既勵匪躬之節引疾則閔勞以事宜推從欲之仁厥有故常用昭異數具官某沈靜有守惠和而通問學得於家傳經術明于世務持橐簪筆徧儀侍從之華剖竹分符屢易翰藩之寄自違朝著久佚祠宮忽抱疾之有加願辭勞而歸老進官一等俾休餘年其茂對於寵光尚克寧於幹止

唐輝除右史

朕惟唐虞三代之盛皆有史官紀其行事千載之後如

出乎其時而見乎其人者書之傳也今吾左右置史執筆記言動亦以昭示後來厥任重矣惟爾秉心直諒迪德惠和學靡空言慮無遺策頃自臺屬擢備諫員謹議日聞風節彌勁茲用稽之士論俾直殿坳昔遂良由諫大夫知起居事善惡必記以戒太宗不為非法而魏謩自補闕為右史文宗猶以朝廷闕失責其論奏此朕所以命爾之意爾宜勉焉無愧古人以永發譽

謝克家移郡

懷仁義以事君入則罄嘉猷於帷幄居賢德而善俗出則分憂寄於藩維雖二者任職之不同然一於寵遇而無間矧竭均勞之請宜推從欲之恩具官某疏通而有謀莊重而不倚見聞殫洽故能洞羣言之微議論宏深可與圖當世之務蚤延登於輔弼俾茂贊於經綸自去巖廊數更符竹趣奉介圭之覲詔陪講席之游大一統於麟經覺斯文之未墜冠諸儒於虎殿廣舊學以多聞俄爽節宣屢形懇避念稽古之功未究而引疾之志莫

移昇以近邦寬予南顧徒得君重當無薄於淮陽惟既厥心尚不忘於王室

張絢改官

朕分遣御史循行天下察吏治之能否而升黜之爾以材濟效官發聞於下邑遂獲論薦名見便殿敷奏詳明茲用進爾京秩以示褒寵夫千里之行始於足下往加策勵用勉遠圖

章誼洪擬各轉一官

為官擇人取正銓衡之法以稽為決具存簡冊之公屬  
兵火之蕩焚詔臣工而緒正成書來上第勞有差具官

某博通世務而言必據經明習憲章而事無遺策

云頃

貳司寇考法治官

擬

云頃由宗伯兼長治官俾專筆削之

工釐補詔條之逸昭明義類迄就編謄分核品流悲從

科指吏絕詐欺舞文之弊士無流滯失職之憂寔繫爾  
能有協朕志章程既定仍舊貫於七司褒典有加進文  
階於一列往服休命知予眷懷

周聿許博范伯奮改官

朕寤寐求材唯恐不及雖布衣之士延見訪問猶將用  
其言而顯其身矧如爾等咸以行能克施有政肆加名  
對議論簡於予衷可無異數昭示寵獎其各改序京秩  
以需進用

梁汝嘉轉一官

唐李巽領鹽鐵初歲之利如劉晏之季年其後則三倍  
晏時今國家經費浩繁鹽利居半分道置使務廣賢儲

爾以通敏之材嘗被簡擢頗能為朕操致奇贏課其歲入視昔增羨使諸路得人悉如爾者亦何必遠希晏異哉宜進一官以為爾寵往服休命益勵遠圖

虞灃除左司

天下之士固有優於政術而辭采或不足觀能於文學而吏事乃其所短朕勵精圖治求全材而用之則官人之方莫如歷試以爾典校秘文資以多識論譔東觀敏而有辭方將考寔於事功而即省踐揚未究厥蘊若時



宰屬夙號要司糾察六曹分摠萬務肆以命爾益試其  
能夫盤根錯節游必有餘者大匠之斲也勉既厥心以  
副朕意待汝舉職則有褒遷

陳昂除吏部郎官

朕惟艱難以來銓部之法日失其序比加刊定著之方  
冊將選通敏之士各修迺職奉以周旋惟爾奮自諸生  
久更器使屬予司寇藹有休聲茲用序進劇曹究其施  
設夫成法具在待人而舉能使吏奸寢息而官曹益清

是為守法尚克勉之朕將於汝觀焉

魏良臣除刑部郎官

朕惟官人之方徇名不考其寔則浮偽者勝徇法而必  
以次遷則陸沉者衆爾以儒術自奮效官輦轂之下率  
身自檢屏迹權門嘉有譽言肆令召見觀其占奏名寔  
具乎宜膺不次之除用示求材之勸亟升郎位往屬秋  
官無怠厥修思所以報

陳規除直龍圖閣知廬州安撫淮西

朕惟淮西之地沃壤千里北人南下莽為盜區雖干戈  
擾攘之難略平而創痛呻吟之聲未息非夫練達老成  
之士往殿厥服何以寬朕深憂具官某靜重有謀果毅  
以達蚤勵忠勤之節屢膺藩翰之寄折衝禦侮疆場綏  
靜牧人御衆閭閻輯和朕嘗考觀安陸池陽之政多乃  
成績茲用峻以內閣河圖之直昭示褒寵汝其為朕徒  
治合肥振肅中權拊安諸郡昔魏尚守雲中而匈奴不  
敢近塞龔遂治渤海而賊盜至於棄兵往師古人無使

聲名減於前日則予汝嘉

吳敏封贈二代

故祖父故祖母王氏段氏

朕大享合宮祇見上帝肆頒渥澤均迨於臣工燕及私庭豈間於存沒具官某故祖具官某生而積德樂於隱

淪

故祖母云素有積德用發慈祥

報在乃孫寢以光大時惟故相屬奉責

祠方慶賜之遂行推本原於所自維師一品追責九泉

故祖母云更封大國追責重泉

尚克有知服茲休命

故父

腦詞  
同前

具官某故父具官某抱材不試積德在躬發其幽  
光克有嗣子時惟故相屬奉貢祠方慶賜之遂行推教  
忠之所自寵增峻秩追賁重泉尚其有知服此休命

故母夏侯氏

腦詞  
同前

具官某故母具封某夙奉蘋藻具宜室家積德在  
躬有子而貴時惟故相屬奉貢祠方予慶賜之行慰乃  
劬勞之報寵增封秩追賁泉扃尚克有知服此休命

祖母韓氏

朕躬執圭幣大享於合宮需澤下流羣工卿士爵命及其私庭時乃舊章予不敢廢具官某母具封某氏淑懿行有聞里族慶種厥孫寔惟故相眷茲盛禮宜錫恩榮爰增大國之封用侈雕軒之飾往服休命益介壽祺

妻曹氏

腦詞具官某妻具封某氏淑懿行有聞里族作配君  
同前  
子嘗為輔臣宜更大國之封  
云云  
同上

王秀除直秘閣仍賜章服

朕遭多故深懷磐石之宗睦族以恩欲大本根之訖以  
爾襲神明之貴曹崇信厚之遺風志在詩書不驕於富  
貴施之政事克勵於廉勤有嘉屬藉之賢獨藹薦紳之  
譽俾升華於內閣仍賜寵於身章庸示展親以褒有德  
往服休命無怠爾猷

徐杞除司勳郎官

賞國之典也以待天下有功之士若時司勳寔掌其法  
以辨其等而詔爵祿焉惟爾練達老成恪勤事業列職

民部克有能稱往贊治於天官以參校於勲籍昔王成以偽受賞而後之俗吏多為虛名爾勉圖之用懲其弊

沈昭遠除戶部郎官

以版籍考戶口之耗登以地征制財用之出入民部之職郎寔參之惟爾蚤勵材猷亟蒙罷使效官樞府有裨密議宜升省戶益究厥能往修而官以副朕足國裕民之意

章誼除龍圖閣學士



寶河洛圖書之瑞宏內閣之邃嚴奉祖宗謨訓之藏極  
儒臣之榮寵式序在位必協公言具官某博稽藝文  
達政體粹然論議智每合於投機試之劇繁才有餘於  
游刃以嫉惡振霜臺之譽以持平守法寺之公擢貳秋  
官有嚴邦禁為屬樞府克贊兵謀尉高侍從之華嘉乃  
踐揚之久冠西清之峻職正學士之隆名庸示殊恩式  
彰有德往祇厥服思振所蒙

孫近除給事中

國家以三省綱紀天下而東臺封駁之司寔萬機出納之地欲使發號施令罔有不臧立政官人動無過舉宜得剛明練達之士以修厥職肆求在列僉曰汝諧具官某負挺拔之資富精微之學蚤先羣彥再掇異科秀於文詞得宇宙中和之氣措諸事業究朝廷設施之宜恥違道以干時久淹才於外服頃方擢備記注遂掌絲綸既多潤色之工尤竭論思之助宜進司於平奏用益展於壯猷簡自朕心克協公論惟爾代言之日已屢聞於

直聲則夫批勅之風諒無愧於前史往共乃事尚勉之  
哉

聞人武子改官

朕比遣將臣經理疆宇爾居幕府久以材聞賜對便朝  
占奏有足嘉者宜略銓部之法改序厥官其往悉心以  
佐武服以稱朕待汝之意

王雱改官

朕惟爾兄以身徇國不得終於牖下念之惻然同氣之

親如有闕者嘗掌執羈約從朕於艱難宜有以優恤之  
改序厥官無忘報稱

華陽集卷四

欽定四庫全書

華陽集卷五

宋 張綱 撰

外制

劉大中除右司諫

朕兢業圖治如涉淵冰深惟萬幾猶懼有闕敷求端寔  
剛明之士備耳目之官左右規切以開廣視聽惟爾博  
通儒學敢於有為奉指觀風百吏震聳入居憲府志節  
彌厲茲用進爾於七人之例夫大則廷議小則上封諫

臣之職也爾其夙夜罄竭輔朕不逮傳不云乎千人諾諾不如一士諤諤朕三復之蓋於爾有望焉

王存追復資政殿學士左正議大夫贈右銀青

光祿大夫

朕念秦陵憂勤天下時有廟堂元老左右弼諧協成不功垂裕後世歲月逝矣遺忠隱然尚其典刑可勵媮薄寵榮弗及公論謂何具官某躬蹈古人夙有重望引義慷慨見於立朝元祐之初首膺簡用進位丞轄厥德茂

馬中遭煩言陷於鈞黨齎志沒地久未昭雪朕方旌別  
淑慝以定國是肆疇勲緒考以舊章升秘殿之隆名陟  
文階之峻秩垂光幽壤流澤來裔精爽如在尚克欽承  
韓膺胄除直秘閣與外任

右府掌兵中臺布政分隸厥事其來尚矣今爾任吾宰  
屬以材自奮顧於樞輔職靡所闕乃遽引嫌丐從外補  
勉徇抗章之懇俾升延閣之華往服恩榮別膺器使

李大有除左司

朕以二三大臣總中臺之政設官置屬分贊左右一事之舉差若毫釐之遠天下休戚繫焉惟爾頃由郎省出膺郡寄能以材術自勵治譽藹然則夫朝廷施設所宜於民者亦既深究而熟講之茲用命爾為吾宰士爾其悉心往共乃服以其所見於昔考所行於今必使六曹萬務各當其理若網在綱有條而不紊庶幾流澤於下而民有愜志則予汝嘉

錢圻除刑部郎官



六卿之屬皆朝廷高選而刑辟重事掌於秋官必資通  
明練達之士庶革頽放紛之弊以爾文學行藝稱於  
縉紳中外踐揚顯有嘉績其注列於即位用參獻於刑  
章固非在中尚迪有慶

張致遠除監察御史

朕拔舉賢能執憲轂下豈惟使之督察吏治亦將勵其  
風節取人所難以待異日之用惟爾問學淵博材猷敏  
彊見於設施信其有立是宜擢居臺屬贊肅綱維惟公

無私可以守法惟明不蔽可以照奸人之言曰柔亦不  
茹剛亦不吐無縱詭隨以謹罔極吾將以是望汝尚克  
勉之嗣有褒寵

許份贈四官

陳力就列者人臣之義隱卒崇終者朝廷之仁嘉乃遺  
忠肆推郵典具官某嗣傳家學躬有令名蚤被遇於熙  
朝亟升華於禁路事功克著揚歷滋多久去周行方遂  
掛冠之懇載披奏牘遽聞易箚之言念其平生為之惻

恒陟文階之四等賁餘澤於重泉尚具有知服我休命  
韓之美李恪各轉一官

日者敵大入襄郢一方為之騷動而安睦密邇形勝相  
望爾等或任守臣或貳郡政嚴武經而外拒固吾圉以  
自安敵不敢窺民用無擾有司言狀朕甚嘉之何愛一  
官不為爾寵往服休命益懋遠圖

胡世將除禮部侍郎

朕當艱難之時尤謹於禮故凡典司之任必擇其人眷

迺秩宗寔為高選若時置貳用米公言具官某風猷靜  
淵器質通敏蚤發揮于事業寔揚歷于禁嚴炳若詞章深  
得代言之體粹於議論屢殫造膝之忠畀方面以宣勞  
摠中權而兼制化行里俗荒疇漸復於春耕令肅兵屯  
外戶不聞於夜閉方渴論思之助宜還表著之聯往副  
六卿遂典三禮夫出維周翰既已臻賣刀買犢之風則  
入備漢儀豈復憂拔劍擊柱之事勉勵夙夜用副簡求

劉岑除刑部侍郎

朕惟王政必本於仁恩宜重萬民之命俗吏或牽於私  
意靡遵三尺之公肆求時髦俾職司冠具官某性資敏  
明而輔以博古之學辨論詳雅而發為華國之文夙藹  
譽於儒林並躋榮於要路彌綸省闈肅振綱維揚歷清  
班蔚高領袖察其更事之久必能議法以情簡自朕心  
宜掌邦禁往攝貳卿之事進聯法從之班爾其端一意  
以持平審四方之奏讞民之多辟忍橫被於非辜法無  
二門尚參決以古義用迪咸中之慶庶追止辟之風

唐恕贈徽猷閣侍制

上有旌賢錄舊之德下有生榮死哀之美朕覽觀前史  
有味其言是用優寵臣工不間存沒具官某名德之後  
蹈履五常浮沉半生不為勢屈眷言靜退之節足以率  
厲本朝自山林寘於卿列朕方嗟其相見之晚人皆  
期以不次之除如何老成奄忽長逝矣少也懷才不見  
於用晚而見用不盡其才追想遺德於予心有戚焉次  
對西清參謀法從以彰眷禮以慰爾地下之靈尚其有

知服我休命

鄭作肅除直秘閣

宰屬要官彌綸省闈爾居其位以稱職聞尚宜服勤究  
乃施設遽茲引疾祈去周行考厥舊章寵升延閣姑遂  
爾志往其欽承

韓肖胄知温州

量材受任進賢雖協於公朝居寵思危引分乃全於臣  
節眷予近輔祈解要樞爰推從欲之仁曲示均勞之意

具官某性資夷粹識度淵宏蚤宣力於事功寔升華於  
嚴近疇若名臣之緒夙推濟美之賢越自貳卿登於石  
府出疆萬里嘉復命之良勤坐制四夷方運籌之有賴  
奏章俄上去志莫回俾辭宥密之司往即維藩之寄奉  
行詔令其務息於民勞益勵忠規尚無忘於王室

梁汝嘉除徽猷閣侍制

朕惟今日巡幸之邦形勝有同於畿甸若時浩穰之治  
刺裁寔賴於守臣疇厥功庸宜加寵異具官某有疏通



之智有強敏之材早自奮揚亟蒙任使即山煮海課歲  
入之居多輓粟飛芻致軍儲之有裕旋委翰藩之重俾  
司輦轂之繁吏有黠奸望風引去事雖盤錯投刃皆虛  
數引見於便殿信迺言之底績升華次對進列西清庶  
同增秩之褒庸示懋功之勸往服明命益勵遠猷

沈與求知鎮江府

朕觀東南形勝之地京口寔當上游方茲時巡尤所倚  
重思得折衝厭難之士以修古方伯連帥之職用作外

屏寬予內憂具官某學不守於空言才克施於有政蚤  
膺簡拔亟寘清華執法憲臺則排姦擊邪紀綱復振率  
屬銓部則揚清激濁流品自分玉堂推詞翰之工經幄  
聲論思之助以其蓄之有素故能用無不宜久去周行  
殊鬱士論是用起從宮觀殿此大邦眷惟一路節制之  
權加以萬旅營屯之寄非威重足以鎮浮則人不服非  
惠和足以宣化則下不安往圖厥功奚俟多訓

侯延慶除太常少卿

朕惟六經之道同歸而禮之用為急遭時多故奉常之  
官名存而寔廢孰能為朕褒舉闕遺正其名物庶幾一  
代之制尚有典刑惟爾博學而文強識以敏考其施設  
譽在縉紳比自侯邦召寘右史時乃舊事已試曰能宜  
更錫於贊書俾遂亞於卿列朕方布告中外有事郊丘  
爰復舉於上儀其敢忘於舊典討論制作在爾勉之

蘇攜除宗正少卿

朕觀周南麟趾之化而美召穆公糾合宗族之詩眷言

懿親曲加敦叙惟是圖牒散逸未克訂正屬之卿寺必推其人以爾明純惠和名臣之子更歷事任為時老成久處退閒厥間彌著用復寘於少列俾職司宗夫宗正之設非獨序正屬籍辨昭穆之親疎也典刑視效於是乎取之勉爾所職昭厥象賢之美使吾同姓皆知蹈履先德亦所以勸勉顧不韙歟

陸長民除右司

朕惟朝廷之官皆為擢用至於宰相之屬尤號要司贊

綱紀出納之權懋省闈彌綸之望孰能任此莫如汝宜  
惟汝蚤奮才猷亟蒙器使勤勞備著中外迭居若時都  
公寔乃舊職稽其已試之效考以僉言之同是為得人  
往共厥服惟明敏能會法意惟公勤能督吏奸使六曹  
無滯於所行則萬務不勞而自理祇若子訓嗣有寵褒

晏復除吏部郎官

朝廷品覈人物掌以天官分總銓衡惟郎是賴爾以識  
度之遠材術之優頃蒙簡求與吾選事今用復爾於外

俾列舊職爾其悉意一從事於新書使夫黠胥不能玩法而寒微無留滯之歎則予汝嘉

胡松年除吏部尚書

中臺分建六職允為喉舌之司文部品序羣材尤重銓衡之寄遭時艱棘舊典逸遺方考寔以成書思得人而總治求於試可宜以次遷具官某諒直而粹溫疏通而敏博才周衆務本於獨見之明學洞羣言輔以力行之志蚤持從橐克勵忠規代言西掖而進專瑣闡封駁之

嚴率屬冬官而兼備經幄講論之益會鄰邦之脩聘將  
使指以出疆言不見於幾微動輒得其要領嘉乃任職  
簡予深衷俾升常伯之聯用冠甘泉之列既師言之允  
穆庶邦治之協寧昔魏用毛玠崔琰典吏曹化清儉  
之節於多士唐以宋璟李义掌選部擅平允之譽於一  
時往既厥心古人不遠

陳與義除禮部侍郎

朕選六卿之亞皆民譽也故具官掌銓衡之政而宗伯

總禮文之事然劇易之職不同至於佐其長以率屬則  
協心盡瘁厥任惟均具官某蚤以異材亟登邇列分職  
吏部期年於茲奸弊既除譽言無間念方使之進陪經  
幄兼直玉堂若猶責以煩劇之勞將恐妨於論思之益  
宜從所便易畀簡曹且禮所以治神人和上下豈在區  
區文物之間為哉爾其勉修厥職使夫日力有裕而專  
意於問學文章以奉我清閒之燕朕心所望尚克體之

胡世將除刑部侍郎



朕惟天下一物失所尚足害政故於刑辟之事尤致哀  
矜秋官亞卿率屬為重朕所選昇非賢不居具官某學  
窮經術而知其變通智達事幾而見於施設比自侯服  
召還秩宗雖未即於周行已大孚於羣聽會茲司寇方  
務得人載詢僉言咸曰汝可昔者伯夷降典要在折民  
惟刑臯陶制百姓於刑之中而曰以教祇德蓋二官任  
職雖或不同然一體相須未始有間往師古意其審克  
之

劉岑除吏部侍郎

朕方肇修銓衡之法付之吏部使天下之士咸以資格聽其考序其職顧不重哉非得夫剴煩治劇之才何以勝激濁揚清之任具官某學博而有守言大而力行擢貳秋官掌予邦憲以情論法吏不敢欺信其才高可膺煩使治官之亞汝宜攝承夫裴馬之能述於史氏後世稱焉往其懋勉無愧古人是為任職

唐輝除中書舍人

文章爾雅訓詞深厚獨稱西漢而後世罕能及者朕心  
慕焉是以敷求天下修潔博習之士置諸左右侍從之  
列使備述作庶幾古人具官某秉德粹完操行純固韞  
積六經之奧服膺一善之微蚤勵才猷亟蒙器使擢居  
諫省知無不言進列史官書必以法朕既嘉其風節之  
勁又嘗考迺詞章之華宜陟綸闈遂典書命夫代言之  
任是謂儒者之至榮然稱職為難當識國家之大體益  
勉所學以宏厥聲



華陽集卷五